

BAB V

PENUTUP

Penubuhan Islamic Bank of Thailand di negara Thai ini, telah menjadi senario yang menakjubkan bagi penduduk negara Thai, khususnya di wilayah Pattani yang adalah tempat cawangan pertama *Islamic Bank of Thailand* ditubuhkan di kawasan wilayah Selatan. Dalam menjalankan kajian ini, penulis dapat membuat kesimpulan hasil dari keseluruhan disertasi ini. Kajian ini merupakan suatu penyelidikan institusi kewangan yang penting di Thailand pada masa ini. Kajian ini dimulai dengan kajian mengenai definisi-definisi Sistem Perbankan Islam yang telah dikemukakan oleh para cendekiawan, ahli ekonomi dan istilah dari kamus yang biasa digunakan dan juga teori pembangunan dalam ekonomi Islam serta dengan hubungkait antara Sistem Perbankan Islam dalam pembangunan ekonomi ummah.

Dalam kajian ini juga, penulis mengemukakan definisi sistem ekonomi Islam adalah sistem ekonomi yang terulung dan merangkumi semua aspek kehidupan ummah, oleh sebab sistem ekonomi Islam, bukan hanya mementingkan harta benda sahaja, bahkan berprihatin terhadap nilai hidup yang sejahtera dan makmur tanpa penindasan. Sistem perbankan Islam adalah sistem perbankan yang berdaya teguh, walau beberapa abad sahaja ditumbuhkan tetapi sistem perbankan Islam dapat membuktikan kepada dunia sekarang bahawa dapat beroperasi sebagai sistem perbankan tanpa faedah dan berjalan atas dasar prinsip yang tidak bercanggah dengan Syariah.

Perkembangan sistem perbankan pada zaman awal Islam dan moden yang penulis mengemukakan sejarahnya dari awal penubuhan pada tahun 1960-an sehingga sekarang dapat membuktikan bahawa sistem perbankan Islam di seluruh dunia berkuasa berdiri teguh walaupun di tengah-tengah krisis kewangan dunia yang melanda. Dalam kajian ini, penulis membincangkan tentang gerakan sistem perbankan Islam di Thailand

semenjak dari awal sampai sekarang, dari perkembangan institusi kewangan seperti koperasi Islam dan lain-lain yang menjadi tempat tuju masyarakat Islam di Thailand.

Semenjak awal penubuhan Islamic Bank of Thailand, bank ini telah menjadi sasaran simpanan pagi penduduk yang beragama Islam yang ingin mengelakkan dari bercampur dengan unsur riba, namun terdapat sebahagian dalam kalangan penduduk yang beragama Buddha yang mengambil perkhidmatan dalam sistem perbankan Islam. Bank ini telah berkembang pesat dalam tempoh yang singkat, dengan penubuhan cawangan di seluruh negara Thai dari tahun 2004-2011 sebanyak 101 cawangan, khususnya di wilayah Pattani terdapat 8 buah cawangan bank ini, menunjuk bahawa Islamic Bank of Thailand dapat sambutan yang baik dari masyarakat pada satu tahap.

Islamic Bank of Thailand telah beroperasi selaras dengan prinsip Syariah dengan menggunakan mekanisme seperti Mudarabah, Murabahah, Bay' al-'Inah, al-Ijarah, seperti mana kebanyakan bank-bank Islam di seluruh dunia mengguna pakai. Dalam memainkan peranan sebagai kewajipan dalam pembangunan masyarakat dari beberapa aspek seperti pembangunan ekonomi masyarakat, pembangunan pendidikan. Islamic Bank of Thailand telah banyak membantu bebanan penduduk wilayah Selatan yang berpendapatan rendah supaya dapat akses pembiayaan, seperti pembiayaan akar umbi dan lain-lain, di mana terdapat sebahagian yang tidak berkuasa untuk mendapatkan pembiayaan dari saluran biasa, oleh sebab tiada aset untuk menjamin untuk mendapatkan pembiayaan. Bahagian pembangunan ekonomi dan sosial 5 wilayah Selatan Thailand banyak memainkan peranan penting untuk meningkatkan taraf kehidupan penduduk wilayah Pattani dengan cara yang selaras dengan ajaran Islam.

Hasil dari kajian ini, penulis akan memberi beberapa rumusan, kesimpulan dan cadangan-cadangan kepada pihak Islamic Bank of Thailand untuk meningkatkan daya perkhidmatan dalam pembangunan ekonomi di wilayah Pattani, Selatan Thailand.

5.1 Rumusan

- 5.1.1 Pusat pembangunan ekonomi dan sosial 5 wilayah Selatan Thailand, Pusat Pattani adalah satu unit di bawah Islamic Bank of Thailand yang bertanggungjawab khas dalam menawarkan perkhidmatan untuk mempertingkatkan ekonomi penduduk wilayah Pattani. Menurut hasrat kerajaan untuk membangun ekonomi dengan menawarkan pelbagai produk, akan tetapi produk yang amat berpengaruh dalam pembangunan ekonomi iaitu produk pembiayaan akar umbi, produk pembiayaan untuk membangun kerjaya kerajaan, produk pembiayaan buruh Thai di Malaysia, produk pembiayaan perniagaan pakaian Muslim, produk pembiayaan makanan halal runcit. Namun selain dari produk-produk tersebut, tidak banyak berperanan dalam pembangunan ekonomi, oleh sebab tidak dapat sambutan dalam kalangan masyarakat Melayu Pattani.
- 5.1.2 Kebanyakan pelanggan yang memohon pembiayaan adalah penduduk yang berpendapatan rendah dan tidak tetap. Kelulusan pembiayaan tergantung kepada penelitian BC dan FO, oleh sebab produk-produk pembiayaan tersebut tidak perlu kepada aset jaminan yang menanggung risiko yang tinggi bagi pihak Islamic Bank of Thailand dalam pengurusan pembiayaan tersebut.
- 5.1.3 Pelbagai cabaran yang dihadapi oleh Islamic Bank of Thailand khususnya di Pusat pembangunan ekonomi dan sosial 5 wilayah Selatan Thailand terdapat cabaran dalaman seperti kekurangan tenaga yang berkualiti dan pakar khas dalam bidang ekonomi dan adanya yang mahir dalam bidang perbankan Islam akan tetapi akan keluar apabila mendapati pekerjaan yang lebih baik. Cabaran luaran yang amat jelas iaitu berkaitan dengan konflik yang berlaku di wilayah Selatan yang banyak terjejas dengan operasi Islamic Bank of Thailand.
- 5.1.4 Semenjak kedatangan Islamic Bank of Thailand telah memainkan peranan penting dalam membangunkan ekonomi wilayah Pattani dengan menawarkan produk-

produk dengan menekankan terhadap penduduk bawahan yang tidak dapat akses pembiayaan di bank konvensional.

5.2 Cadangan

- a) Pihak Islamic Bank of Thailand perlu membuat penerangan kepada penduduk wilayah Pattani dengan membuat kempen masuk ke dalam kampung dalaman supaya memberi penjelasan tentang pelaksanaan sistem perbankan Islam, oleh sebab banyak lagi dalam kalangan masyarakat Islam di wilayah Pattani yang tidak yakin terhadap produk perbankan Islam di Islamic Bank of Thailand, mereka menganggap Bank Islam itu sama dengan Bank konvensional sahaja.
- b) Pihak Islamic Bank of Thailand perlu mempertingkatkan daya perkhidmatan dari segi Teknologi dan perbankan Internet, oleh sebab kekurangan dari segi tersebut menyebabkan penduduk wilayah Pattani lebih selesa dengan perbankan konvensional dengan pelbagai perkhidmatan yang canggih ditawarkan.
- c) Pihak Islamic Bank of Thailand perlu membuat kursus dalam mempertingkatkan daya perkhidmatan terhadap kakitangannya dalam memberi perkhidmatan yang lebih baik dan memperbanyakkan kakitangan yang beragama Islam, oleh sebab kakitangan Islamic Bank of Thailand di seluruh Negara Thai hanya 30 peratus sahaja yang beragama Islam dari keseluruhan kakitangan Islamic Bank of Thailand.
- d) Khazanah fiqh merupakan tempat rujuk kesahihan produk perbankan Islam, penulis mencadangkan supaya pihak pembangunan produk-produk memperluaskan lagi penawaran perkhidmatan dalam menerokai konsep perbankan dalam Fiqh muamalat seperti Muzara'ah, Musaqah dan lain-lain oleh sebab kawasan wilayah Selatan adalah kawasan pertanian, penawaran produk yang berasas konsep ini, akan dapat membantu para petani dalam akses dana dalam sistem perbankan.
- e) Untuk Pusat pembangunan ekonomi dan sosial 5 wilayah Selatan Thailand perlu mengambil berat tentang pelantikan BC, oleh sebab menurut penelitian penulis, BC

sangat kurang pemahaman terhadap sistem perbankan Islam dan pemahaman tentang pembiayaan produk perbankan Islam selaras dengan matlamat Islamic Bank of Thailand dalam pembangunan ekonomi sebagai tanggungjawab utama bagi bank Islam.

- f) Untuk kajian kesinambungan bagi pelajar yang ingin membuat kajian tentang pembangunan ekonomi, penulis mencadangkan membuat kajian tentang ekonomi mikro khas dalam kawasan wilayah Pattani untuk mengetahui dan mengkaji secara detil tentang pelaksanaannya dalam membangunkan ekonomi masyarakat bawahan dan penyelarasan dengan hukum Syariah dan juga kajian tentang penerimaan masyarakat Islam Melayu Patani terhadap sistem perbankan Islam, untuk mengetahui kefahaman dan pengetahuan penduduk wilayah Pattani terhadap perbankan Islam.